

Dos mucha condena pa a abusa di 4 mucha menor di edad

ORANJESTAD – Ayera mainta Corte den Prome Instancia a dicta sentencia den un caso penal cu Ministerio Publico a cuminsa contra dos mucha menor di edad. Ambos a wordo haya culpabel di a abusa di 4 mucha menor di edad.

Caso cu portanan cera

Algun siman pasa, Bon Dia Aruba a wordo informa cu lo trata e caso cu portanan cera, mirando e seriedad y cu ta trata di menor di edad. Segun ley, ora ta trata di menor di edad, hopi biaha ta trata e caso cu portanan cera. Sinembargo, segun ley, tur sentencia mester wordo duna cu portanan habri o sea cu prensa y publico por ta presente. Esey a sosode ayera tambe.

Ta di aplaudi cu Hues a tuma un rato pa splica e mayornan di e victimanan cu tabata presente y tambe mayor di e dos acusadonan, con e ley penal pa hubentud ta hinca den otro. Hues a muestra cu pa e mucha S., segun ley penal, no por persigui ningun persona cu ta mas jong cu 12 aña. Den e lamentabel caso di abuso aki, tin un periodo caminda S. tabata menos cu 12 aña. E resto di e periodo si Hues ta haya proba cu S. y su ruman D. a haci actonan immoral cu otro muchanan. Hues ta haya tur dos castigabel.

Abusa di 4 mucha

Hues a bisa cu pa e castigo e ta tene cuenta cu tempo cu e rumannan a haci e echonan, nan tabata menor di edad y ainda ta menor di edad. El a muestra cu recien a introduci ley penal nobo. A introduci ley special pa hubentud caminda e castigo ta menos cu e castigo pa adulto. Hues a bisa cu ta comprendibel cu e victimanan tin menos comprension pa esaki

pero legislacion ta tene cuenta riba e cambio di comportacion di e mucha pa ora e sali di prizon, e ta cambia su bida.

Den e caso aki 4 mucha chikito a wordo abusa di nan. Hues ta haya cu e dos rumannan a pensa riba nan satisfaccion y no a pensa riba e consecuencia pa e muchanan. E ta haya cu e rumannan a abusa di e confianza cu e muchanan tabatin den nan. Ta conoci cu den casonan di abuso sexual, e muchanan lo por keda afecta. Hues a muestra cu e muchanan, ora nan bira grandi nan por haya nan mes confronta cu problema emocional y sexual. E ta haya cu e dos rumannan no a tene cuenta cu esaki.

Hues tambe a tene na cuenta cu ta prome biaha nan ta cay

cera pa algo asina y cu nan a realiza cu loke nan a haci no ta bon.

Analisis di psychiaternan

Hues a muestra cu dos psychiatrist specialisa den mucha, a evalua e rumannan y a entrega dos rapport. Cada un tin su punto di bista. Den caso di S. nan ta conseha pa e bay Centro Ortopedagogico y cu Reclase-ring mester guia esaki. Hues a bisa cu mirando e consehonan ey, e ta bay di acuerdo cu exigencia di Fiscal cu excepcion di ehecucion di inmediato di condicionnan.

Pa loke ta D., Hues a muestra cu un psychiatrist a conclui cu D. tin un deficiencia mental. Pa motibo cu e tambe tabata victima di abuso sexual tempo

e tabata mas jong. E psychiatrist a conseha pa D. bay un institucion special na Hulanda pa e haya tratamento special.

E otro psychiatrist no ta comparti e opinion ey. Hues a bisa cu e otro psychiatrist den su rapport ta muestra cu e no ta haya cu mester manda D. Hulanda caminda e no por papia Hulandes. E psychiatrist ta kere mas pa D. interna na Centro Ortopedico tambe. Na opinion di e psychiatrist den su rapport, e envolvimento di famia ta hopi importante den e tratamento di D. y si D. bay Hulanda esey no ta posibel.

Hues a muestra cu den ley penal di hubentud, ta stipula cu Hues lo por tuma un decision cu ta mas na beneficio di e sospechoso su tratamiento. Hues

a bisa cu e ta kere mas den e conseho di e dos psychiatrist. Hues no ta haya cu si manda D. Hulanda, esaki lo ta na beneficio pe. Hues ta haya cu e observacion di e prome psychiatrist no ta cumpli cu exigencia di ley y ta rechasa e exigencia di Fiscal. Hues si ta haya importante pa D. haya tratamento. Haya cu D. mester haya e mesun castigo cu S.

Castigo

Hues a condena D. y S. na 365 dia di prizon di cual 158 dia ta condicional, cu un tempo di prueba di 2 aña y cu condicion cu 1 Juli 2015 nan lo bay Centro Ortopedico (OC) y sigui tur instruccionnan cu ta wordo duna. Ambos lo mester bay haya tratamento di psychiatrist. □